



Uunga siunnersuutit: Peqqinnissaqarfiup iluani napparsimasut maalaaruteqarsinnaaneratt taarsiiffigineqarsinnaanerallu pillugit Inatsisartut Inatsisaat.

Peqqissutsimut Naalakkersuisoq

Siullermeernera

Peqqinnissaqarfiup iluani napparsimasut maalaaruteqarsinnaaneratt taarsiiffigineqarsinnaanerallu pillugit Inatsisartut inatsisissaattut siunnersuut Naalakkersuisut sinnerlugit Peqqissutsimut Naalakkersuisup saqqummiussaanut Naleqqamiit imatut oqaaseqaateqassaagut.

Naleqqamiit nuannaarutigaarput kiisami inatitsissatut siunnersuut suliarineqaannarani aningaasaliiffigineqartussanngorluni suliarineqarluni naammassiniarneqalermat.

Nalunngilarpummi politikkimi ukiorpassuit suliaqarsimasut inuit ataasiakkaat ilaqutariillu misigisartakkaminnik aqqusaartarsimasaminnik ilungersunarluinnartunik anngutaqartuartarsimammata peqqinnissaqarfiup iluani ilungersunarluinnartunik aqqusaarsimasaminnik misigisimannillu imaannaanngilluinnartunik.

Peqqissutsimut Naalakkersuisup ilumoorluinnartumik oqaatigaa ullumikkut allaffissornikkut maalaaruteqarsinnaanermut taarsiivigineqarsinnaanermullu periuseqartartartut inunnut oqimaatsuusut, amerlasuutigullu suliap suliaralugu aallartinneraniit suliap aaliangiisoqarnissaata tungaanut ukiut amerlasuut ingerlasartut, taamatut nalaataqarsimasunut imaannaanngilluinnartuusumik.

Maalaartarfik naammagittaalliorunnaarniarit

Taamatut inissisisimajuarsimaneq innuttaasunut naammaginangilluinnartuuvoq, suliat assigiinngiaartut pineqartut ersarissumik suliaasaaginnaratik sukkanerungaartumik pitsaanerusumillu suliarineqartarnissaanut innuttaasut taamatut nalaataqartut pisariaqartitsipput.

Ukiorpassuit eqqartugaasareerluni maannakkut 2018-imili suliap sukumiisumik suliaralugu aallartillugu inaarniarneranut suliaq annertusimasoq maluginiagassaavoq, maannakkullu saqqummiunneqartoq Inatsisartut Inatsisaat maalaaruteqarnermut taarsiiffigitittarnermullu



periarfissamik nutaamik pisariinnerusumillu innuttaasut periarfissaqalerneranik inatsit una kinguneqartussaavoq, taamatullu sulianik suliarinnittarnerup qitiusumiit ingerlanneqartalernerata sukkanerusumik ingerlatsisoqartalerneranik kinguneqartussaasoq Peqqissutsimut Naalakkersuisup oqaatigaa.

Peqqinnissaqarfiup pitsaasumik innuttaasunut kiffartuussinissaanut suliat ingerlarnganik ajornannginnerusumik oqaloqatigiinneq pilersinneqarnissaa siunertarineqartoq Naleqqamiit naammagisimaarparput alloriarfittut pitsaasutut isigalutigu, taamatullu arlaatigut eqqunngitsumik pisoqarnerani maalaaruteqartarnermut taarsiissuteqartarnermullu pitsanngorsaaniarneranut periuserineqartumiit ilisimasanik atuisinnaalernissaq aqputissiorneqartussanngorpoq ullumikkut tamanna killeqartuinnartumik inissisimaannarani pisinnaasartoq takuneqarsinnaammat.

Oqaatsit atorneqartut maalaartarfik imalunniit naammagittaalliortarfik assigiinngitsutigut isummorsorfigineqarmata ilanngullugu ataatsimiititaliami nalilersorneqarnissaa innersuussutigerusupparput sorleq tulluarnerunersoq oqaaseq siunertamut atoraanni.

Inatisissatut siunnersuummi Inuit inatsisitigut illersugaanerat pineqarpoq taamaammallu ataatsimiisitaliap peqqissaartumik aaqqitassat ilanngullugit suliaralugu ingerlalluassagaa neriuutiginarpoq, arlaatigullu isumaqatiginninniarnermilu akunnattoorfissaqassappat upernaaru aappasaanernejarnissaa aqputissiuunneqarsinnaasoq Naleqqamiit eqqumaariffigalugu ilisimavarput.

Taamatullu inunntut ataasiakkaanut uani inatsisissatut siunnersuut tunngasorujussuummat ataatsimiititaliami teknikkut aaqqiissutissartaat ilanngullugit nalilersorluarneqarlutik suliap aappasaaniinnginnerani Ilaqutariinnut Peqqissutsimullu ataatsimiititaliami innersuupparput ataatsimiititaliarlu sulilluarnissaanik kissaallugu.